



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Sensakertem yaritsü atema India-i sen cr. 65,000 nungdaker: Raghuram

TAPAK 10

Coach Maggie küm ti atema mapa nungi anentsür



VOL. XVII NO. 183 (ADOK 183) DIMAPUR

ROGONÜ (FRIDAY) MONUPII (MAY) 01, 2020

₹ 5.00

Nagaland densema state 3 nung Covid atema totzü jenjang atu

New Delhi, April 2020 (Agencies): Coronavirus tashidak anema linük shibangba ajanga timtem ajurua India kübok state asem nung totzü jenjang tuogo, ta osang ka ajanga metetdaksü.

Brihostibarnü Nagaland sorkaria petrol aser diesel totzü nung saru tua petrol litre nung saru sen trok aser diesel litre nung sen 5 agitsü, ta sorkari sangdongogo.

Assam aser Meghalaya natia totzü nung saru atuba sangdonga liasü.

Nagaland sorkari sangdong ka ajanga, "Nagaland (sales of petroleum & petroleum products including motor spirit & lubricants) Taxation Act, 1967

(amended) kübok section 3A nung subsection 3 ajanga tashi agüja aliba nung ajemdaker Nagaland Angh-i, tang aliba tax aser cess dak alia Covid-19 saru agitsü," ta metetdaksü.

Taoba hopta Assam sorkaria petrol aser diesel nung saru atutsü lemteta liasü. Taoba hopta Meghalaya-ia petrol litre ka nung sen 68 aliba nungi 72 latet aser diesel litre nung sen 61 aliba nungi sen 66 agi ayoktsü lemteta liasü.

Coronavirus tashidak anema linük tesem ajak shibangba ajanga state aika revenue tsütsü takoksa nguogo.

Linük shibangba ajanga Oil Marketing Companies (OMCs)-ia timtem ajurudar, anungji parnokkia totzü jenjang atutsü akok.

Ak aser arem shi machitsü metetdaksür

Dimapur, Rongchii/April 30 (TYO): Kidanger state nung Aksü wara, koba dang African Swine Fever ta ajar, iba wara poktetba agi tangalen nungi ak bener aruba nokdangtsü metetdaksüba osang sülen tanüa state sorkar osang ajanga arem shiruru talisa Pongzü aser ibala mesükba arem shi machitsü asoshi ozüng ka

metetdaksüogo. Kasa sangdong ajanga iba African Swine Fever virus ya iba amala arem shiruru dak alitsü akok, anungji Deputy Commissioner ajaki yimtsüng putu menden ajak nem iba osang sangoktsüsüla ta Principal Secretary Abhijit Sinha, IAS ajanga metetdaksüogo.

COVID 19 cess agientsü Congress-i akhang

Dimapur, Rongchii/April 30 (TYO): Tang Nagaland nung COVID-19 tashidak wara aruba tebilemsü tenüng nung Nagaland Govt-i Petrol litre shia nung senpak 6 aser Diesel litre shia nung senpak 5 atubaji tang tensa den khenyongi mapet, iba jagi osettsüset aser jangotsü ajak nung jenjang atutsü, anungji neburtemi magizüktsü ta NPCC tir K. Therie-i sangdong ka ajanga metetdaksüogo.

Jenjang ajungkettsü atema cess ajungkettsü melena sorkari rongsenketsüng terenlok asoshi inyakba den jenjang tali akümba azüoka state rongsenketsüng ajungkettsü asoshi rangloker inyaktsüla. Item kuli dak ajemdaker Congress-i iba tetuyuba ya agintsü akhang, ta tir-i ashi.

Jenjang ajungkettem nem DC-i tekümdangtsü metetdaksü Dimapur, Rongchii/April 30 (TYO): Oset balala aser talisa cement nung jenjang atuba indang nüburttemi ashishiba angazükba sülen Deputy Commissioner Dimapur Anoop Kinchi IAS-i, aibelena alirtem nem tapet temerenshi agütsütsü, ta metetdaksüogo.

April 30 nü DC Dimapur conference Hall nung District Level Price Monitoring committee senden ayongzükba amenba mapang pai iba olen shisema liasü. Iba dak sendakba nung DC Dimapur-i, DMC aser administrative officers tem dang jenjang ajungketer yokyatsüyartem nem tapet temerenshi agütsütsü aser parnok aputsü tetuyuba agütsüogo.

COVID-19: State kübok district ajak nung chiyongtsü peria lir

Dimapur, Rongchii/April 30 (TYO): Principal Secretary, Home, Abhijit Sinha, IAS-i April 30, 2020 nü Nagaland nung COVID-19 tashidak wara den sendakba osang ka sangdongba mapang, state nungi iba tashidak tendangtsü atema sample 653 bener yokba nungi sample 640 indang osang aruogo aser sample ajak negative lir, ta ashi. Tanüngba sample 13 indang osang ano maru lir. Brehostibarnü state nung nisung 1755 screening süogo aser nisung

33 Facility Quarantine nung yua lir, ta ashi.

State nung COVID-19 Hospital 12 lir, aser item mozüki nung ventilator 25 lir aser yangji yipten 464 den ICU yipten 48 lir. Item mozüki nung COVID-19 tashidak agi shiranger südi ta temolung meleme alirtem ayutsü atema isolation bed 117 yua lir. Medical emergency mapang amshitsü atema state nung sorkar meyong ambulance 99 aser nija indang ambulance 40 lir, ta Principal

Secretary-i ashi.

Linük tesem ajungalen COVID-19 tashidak wara prokshiba azüoktsü mechi anempongba ajanga state balala nungi Nagaland-i maruteti alir nisung 7114 nem senotsü teyari agütsüogo aser item rongnung mapa inyaker nisung 4,476, kaketshir 2,522 aser shiranger 116 lir, ta paisa ashi.

Maneni paisa, state kübok district ajak nung jang-o-tzü, mozü, POL aser danga nungdakba osettsüset peria yua lir, ta metetdaksü.

Nagaland asoshi aliba ambulance-garitemji tejen masü

Dimapur, April 30 (TYO) : Tang Covid 19 tashidak wara den raraba tongpang nung amshitsü asoshi Nagaland state government-i shiranger abenba ambulance gari ya Uttar Pradesh nung alir, kanga rongdak nungdak süa 108 Emergency Medical Transport Services, UP (East) ajanga dang bener arutet. Item ambulance garitemji tejen (second hand) masü saka tasen lir ta tanü sangdong ka ajanga Health & Family Welfare departenmt nung Principal Director, Dr.Vizolie Z Suokhrie-i metetdaksüogo.



Nagaland government-i ambulance gari second hand alia bener aru ta aija osang prokshiba osang ka jangjashitsü dang metetdaksü.

Iba ambulance gari jenjangji GST dena gari ka nung sen lakh 18 adoker aser gari tejen tasenji

Pai iba osang ya, nisung kari

aruagi gari jajaba mileage reprangdangra, ibaji ajangaa metettsü ta paisa ashi.

"Tang mapang ya linük nung ambulance alitsü bushiaka mangu aliba mapang ka, UP government nung asen nisung teyariteper tajung aliba agi ambulance terji renermer lia ngutet aser alia bener arutet," ta iba osangbeneri Chief Secretary, Wb.Temjen Toy dang Nagaland government-i ambulance tejen ali ta jembiba ya kechi ? Tasen ali masü saka lease nung bener arubaa na (?) ta asüngdangdang pai metetdaksü.

(Maneni tapak 2 nung...)

Directorate of School Education ajanga Video Lesson atema metetdaksür

Dimapur, Rongchii/April 30 (TYO): Tang anempongba ajanga class magiteta küpdoktsü mechi Department of School Education-i Doordarshan, Kohima ajanga May 1, 2020 nungi tenzüka Class 8, 9, 10 nung tongtibang subject tem Video Lesson sayu tenzüksü, ta Directorate of School Education sangdong ka ajanga metetdaksü. Item lesson ya May 02, 2020 nü nungi tenzüka All India Radio (AIR) ajanga sangdongtsü.

DEOs/Sr. SDEOs/SDEOs ajak

dang iba osang ya par kübok aliba School tekolapur ajanga nem metetdaksütsü totuyuba agütsüogo aser maneni school ketdangsertemi pei school nung aziungba kaketshir aser tsürabur ajak nem iba osang sangoktsütsü.

State nung tesem tezülen densema ajaklen iba sentong Doordarshan (DD) satellite telecast aser AIR broadcast ajanga sangdongtsü ka kanga tongtipang lir, anungji shia aliba ketdangsertemi District Administration den osang

ola agiteptsü totuyuba agütsüogo, ajiasünung dang kidang DD satellite ajanga item sentong mereprangtetba aser mangatetba kaketshir atema Village Hall mesüra School Auditorium amala nung nungdakbatem anepalutsütettsü, ta sangdong ajanga ashi.

Anogo ka nung class ana indang lesson tem angazüktsüsüa mapang lemsaa lir, anungji dang school/ village council hall nung iba telecast reprangba mapang kaketshir telok tulu madenshitsü, ta ashi.

Medical Minister, Pangnyu Phom-i Longleng semdang

Kohima, April 30 (TYO): April 30, 2020 nü Nagaland Health & Family Welfare Minister, S. Pangnyu Phom den Advisor Industries & Commerce, Imnatiba aser MLA, B.S. Nganlang nungeri Longleng semdanga COVID-19 hospital, Phom Lempong School nung Quarantine site, GHSS nung Makeshift Hospital semdang aser Longleng DC office nung sorkar ketdangsertem aser melungtet telok balala nungi lenirtem den review senden ka menogo, ta ketdangsertem osang ka ajanga metetdaksü.

Iba senden nung jembidang Medical Minister-i Medical department, district administration, Police, osangbenertem, Arogotem, melungtet teloktem aser lokti tentetem densema frontline workers-i longjemer COVID-19 anema raraba atema pelaba lemsatet.

Paisa tarutsü nunga maneni amalitepa inyaktsü ayongzük.

Talisa minister-i doctor, nurse

aser health workers dang shisatsü nung renema alitsü aser pei mapa nendaka inyaktsü ayongzük.

Coronavirus anema state tesem ajaklen hospital tem nung facilities peria maliba dak sendakba nung Pangnyu-i, COVID-19 wara ya ajanga tarutsü nung wara balala atema Department aser care workers renema alitsü aser health care facilities tajung alitsü atema saaksalemdaksür, ta ashi.

Paisa, linük shibanga aliba agienba sülen-a maneni kümdanga alitsü mepishia metetdaksü.

Central sorkari tang aliba district hospital Longleng upgrade asütsü atema agizükogo aser CHC status agi full-fledged district hospital akümtsü, ta minister-i metetdaksü.

Kasa senden nung Advisor Imnatiba, MLA, B.S. Nganlang, M. Shayung Phom DC Longleng, CMO Longleng, Medical Superintendent District hospital Longleng, President

Phom Peoples' Council aser Phom Students' Conference nungia mapang agia liasü.

Review senden ya EAC Headquarter Longleng, Pichano Kikon leniba nung amen. Tesülen parnokisa Tamlu semdanga hospital aser Quarantine centre, GHS Tamlu semdangba sülen Tamlu nung district administration, doctors, nurses, NGOs aser lokti tentet balala den senden amen.

Longleng semdang team-i Longleng District Task Force nem COVID-19 atema sen 200,000 tenla agütsü (S. Pangnyu aser B.S. Nganlang nati lakh 1, Imnatiba-i 50,000, Dr.Longai & Mrs.Anungla 50,000/-) aser Tamlu nunga team-i Tamlu Sub-divisional Task Force nem sen 180,000 (S. Pangnyu 60,000/-, Imnatiba 20,000/-, B.S. Nganlang 50,000/- aser Dr.Longai & Mrs.AnunglaRs. 50,000/-) tenla agütsü.

CORONAVIRUS WARAS ENOK LONGJEMERAKOKTSÜ ASOSHI -

Kechalenia Moi Kidang Mongang; Tangar Anasai Tou; Teni Tebang Sü agi Nembangang; Temang Tashi Itita Yuang; Kidang Asentzü Sendoka Exercise Agiang aser Sarasademang.

Phek nungi yimtsüng aseme aonsotsü lemstsü



Kohima, Rongchii 30: April 29 nü PHQ junction, Kohima nung Phek district kübok yimtsüng aseme bener arutsüba anosotsü balala angati agizükba noksa nung angur.

Kohima, Rongchii/April 30 (TYO): Phek district kübok Thevopisu, Khulazu Basa, aser Porba yimtsü agütsüba organic aonsotsütem April 29 nü Kohima nung Chakhesang Arogotemi angati lemstsüogo.

State ajunga mokdanga aliba mapang aonsotsü agi anünga angateta Kohima nung nüburtem nem angati lemstsütsü asoshi yimtsüng asem yagi mini-truck aser tata mobile sünga aonsotsü balala bener arutsü.

April 29 anepdang yakta parnok apuso aser ghonda aika ajar Kohima atong. State yimtiba atongba sülen parnoki Chakhesang Baptist Church Ministers' Hill, Kohima (CBCMHK) aser Chakhesang Baptist Church Kohima nem kiyong 16 nung anosotsü lemstsütsü asoshi nongloksüba den Phoolbari aser Police Headquarter Junction amala tesemtem nung angati aonsotsü lemstsütsü nongloksü.

CBCMHK, senior pastor

Rev. Dr. Vevo Phesao, shibai PHQ junction nung anosotsü lemstsü metenzük tsüingda temoatsü meshia sarasadema liasü pai, iba amla mapa tajung dak alaka mimchir asoshi aria bilema inyakba mapa tajungba mali, ta ashi.

Anogoshia ama Phek district nungi yimdaklirtem tata gari sünga aonsotsü oshia bener arur aser Arogo temi kiyong balala nung lemstsüdar.

Tanü yimtsüng asem nungi gari sünga aonsotsü oshia bener arurogo aser kiyong balala nung aliba nüburtem adenshia pei tata shilem lemzüka benerogo. Inyakyim ajak tetuyuba balala agütsür aliba dak ajemdaker inyakdar, ta paisa ashi.

Maneni pai, yimtsüng balala nem parnok mapa tajung asoshi tenüngsang agütsüba den Kohima temeket nung Arogo balala teyari mapa balala inyakdar, ta ashi.

Kasa mapang nung state mokdang aliba mapang

CBCMHK-ia kibong 200 shi nem teyari balala agütsüogo. "Asenek mapa tamajung ka ajangshia odar saka onok osangbo; Tsüingrem dak onoki imlar," ta pai ashi.

Khulazu Basa yimtsüng nungi Sekhoyi Chuzho-i ashiba agi, mini truck ka aser tata mobile ka nung aonsotsü oshia bener parnok anepdang züngia 3:00 ako nung apuso. Paisa, yimdaklir 280 shi aonsotsü yatai aremi ao aser parnok 60 shi-i aonsotsü alepba nung teyari agüja liasü, ta ashi.

Rüken, asang, ango napa, tasen o amala aonsotsü tapu 15 shi onoki bendener bener aru aser item ya lemstsütsü asoshi onoki Chakhesang Arogo nem agütsü, ta pai ashi.

Kohima nung alir anosotsü agizüker rongnung kati aonsotsü angati lemstsüba atema yimdaklirtem aser Arogo nem tenüngsang agüja liasü. Shishilembadaki aodang local aonsotsütem angutsü tasak kumogo, ta laisa ashi.

COVID-19 tashidak agi asür tasü mang anepaluyim sayu

Dimapur, Rongchii/April 30 (TYO): COVID-19 dead body management guidelines dak ajemdaker PWD Mechanical, Home Guards & Civil Defence (SDRF) aser MMC staff tem nem Chief Medical Office Conference Hall nung April 28 nü training ka agütsüogo.

Department of Chief Medical Office nungi sangdong ka ajanga ashiba agi, training nung shisalen agütsürji Dr. Aonungdok Epidemiologist liasü aser pai training nung

power point presentation ka ajanga COVID-19 tashidak agi asür mesera tashidak keta alitsü ta temulung melemi bilemba nisung ka tasü mang anepalua indoktsüba inyakyim sayua liasü. Distirct nung tashidak keta alir ka danga putetra parnok nem metetdaksütsü asoshi tangazükba agütsü.

Maneni parnoknem tashidak poktetba, menatepba yimya, temaitsü, tashidak temelaba menatsüba telok, diagnosis, anepaluba yimya aser nokdangtsü atema inyakyim dak

sendakba nung tangazükba agütsü. Tashidak agi shirangba indang jenjang balala indanga parnok nem tangazükba agütsüogo.

Kasa mapang nung teka metsükba yimya indang video tatsüka sayu aser PPE (personal protective equipments) indang guideline sayu aser Mask aser gloves indoktsüba yimya sayua laisü.

PPE asema aser semzükba yimya indang IEC materials tema training nung shilem agirtem nem lemstsüogo.



Ita ka majungdang Zhaleo Rio, IAS (Retd.), Advisor, Sericulture, Excise & Minority Affairs ajanga CHC Medziphema tanaben semdanga quarantine ward tem yangluba aser danga mapatem inyakba April 30, 2020 nü asadanga jaja. 5 Ghaspani-II A/C nungi MLA Zhaleo Rio-i doctor aser staff tem den sensaksema liasü, aser pa meina Tshuvise Phojo, ADC Medziphema aser Miathou Krose, Chairman, Health Centre Management Committee, CHC Medziphema nungertema aru.

Kohima nung COVID-19 mock drill agiogo

Dimapur, Rongchii/April 30 (TYO): Asangsang nung COVID-19 tashidak wara agi menepertem anepalutsü renema aliba yimyatem tali jangjashitsü nükjidong nung District administration, DDMA aser Medical Department lungjemer April 30, 2020 nü Kohima jila nung mock drill agia liasü. District nung COVID-19 tashidak wara prokshiba mapang iba tashidak den raratsü asoshi sorkar meyong agency balala renema aliba tendangtsü atema iba sentong ya ayongzük.

Iba maparen nung tongtibang Standard Operating Procedure (SOP) aika agi aser item rongnung Patient Management and Treatment, iba tashidak keta alirtem den ajurutepa aliba nisungtem bushiteta quarantine asüba, COVID-19 putetba tesem nung mesen asütsü mozü azükba aser tesem shibangtsüba, aser COVID-19 tashidak agi asür temang anepaluba inyakyim tem liasü.

Iba mock drill agiba sülen

Deputy Commissioner aser DDMA mendenpuba, Gregory Thejawelie NCS, shiba RO (Responsible Officer) lir, pa indang office chamber nung senten ka agia liasü.

Incident Response System kübok Incident Commander, ADC Kohima, Lithrongla Tongpi Rutsa-i COVID-19 mock drill exercise indang osang tejangja lemsatop aser iba sülen Operation Section Chief, Planning Section Chief aser Logistics Section Chief nungi report tongmelang agi agütsü.

Section asem nung tekolaktemi iba mock drill mapang metokmeperi ajitetba lemsatop aser tarutsü nung COVID-19 dak sendakba tensa tia ajurudang junga azüoktettsü asoshi item metokmeperi metongshitepa liasü.

Deputy Commissioner aser DDMA mendenpuba, Gregory Thejawelie NCS ajanga iba sentong nung shilem agirtem dang pelaba o shir senden tembanga liasü.

Mokokchung Cart ajanga nung-dakbapur nem aonsotsü agütsü

Dimapur, Rongchii/April 30 (TYO): District Administration Mokokchung ajanga achayanga Mokokchung Cart-i Mokokchung jila nung kibong noklang dak tema nem aonsotsü aser pulse tajem kishiziung tonga bener oa agütsü.

EAC Mokokchung aser Mokokchung Cart indang Nodal Officer, Sentilong Ozukum-i ashiba agi, volunteer aser oset bener oa agütsürtemi jila nung timtemer tejangja kibongtem jangjateta aonsotsü tajem ya ki tonga bener otsü.

Ita ka dak tema Mokokchung Cart team yagi kanga meranga jila temeket nung alir aluyimertem atema shishilembatsü maongka bushia aru, shirnoki anempongba mapang pei züsentetba aonsotsütem meyoktetba aliba ya

yimtsüngtem nungi bener arua Mokokchung Cart App ajanga ayoker.

Mokokchung Cart App atema item aonsotsü ya Trail Hounds telok ama Online Express ajanga agütsür, shirnoki COVID-19 protocol shidak amshia nungdakba oset, mozü aser aonsotsü ki tonga bener oa agütsür.

Aonsotsü meraksai rizünga ayutsü asoshi Horticulture Department ajanga crates tenla agütsü, Mokokchung Town Lanur Telongjem ajanga cotton delivery bag tem agütsü, Team Impact Marep, Mokokchung ajanga kakat agi yangluba carry bag agütsü aser NSRLM Mokokchung, SHG ajanga aluyimertem den osang tsüsang agitepba asoshi Nodal Officer ajanga pelaba lemsatop liasü.

Legislator temi Seyochung semdang

Dimapur, Rongchii/April 30 (TYO): Minister for Geology and Mining, Soil & Water Conservation, V. KashihoSangtam aser Advisor, School Education K.T. Sukhalu, District In-charge on COVID-19, Kiphire nati April 30, 2020 nü Seyochung semdanga liasü.

Tenati CHC semdanga yangji aliba doctor aser medical team den senden mena liasü. COVID-19 tashidak wara nungi nüburtem kümzüka ayutsü mechi ammag sangwa metitemi mapa inyakba asoshi Minister-i medical team aser administration dang pelaba lemsatop aser parnoki metokmeperi ajangshibatem

arendaka melie lemsateptsü ashi. Parnokisa GHS Seyochung nung quarantine centre amenoka aliba semdang, kong block task force ajanga yipten 20 renema lir.

Minister aser Advisor nati yangji aliba yimtsüpyimbo, Seyochung GB Federation tir aser külem tenzüker, Sema-Sangtam joint community ketdangsertem den senden ka mena liasü.

Iba senden nung tensa tajungba kümduktsütsü mechi sorkar inyakyimtem Minister-i metetdaksü aser iba tashidak wara den raratsü asoshi yangji alirtem dang administration aser sorkar den amalitepa inyaktü ajangshia liasü.

Nagaland asoshi aliba... (TAPAK 1 NUNGI...)

"Ambulace ya mangutsü aliba, tia kaa asen nisung Wt.Hekali IAS, tang U.P nung Health Secretary aliba agi, la teyari ajanga dang alitet. Ashi, itemjia Delhi government-i bener aotsüba liasü. Tang ya India ajanga nung ambulance mangur. Iba ama osang jungjunga magitepi aitsüba osang angashi dang aser züngshi dang tezü kanga atanger. Teti onokbo auer aser ashir ama dang nübortemi jembir saka onoki nübortem asoshi kechi

koda bendanga agüja inyaker, aji teyanglur Tsüingremi dang meteta lir," ta Temjen Toy-isa mepelai metetdaksü.

UP nungi angazükba agi, Nagaland government-i aliba ambulance garitem ya ambulance yanglur aser ambulance service agütsür telok ka tenüng agi GVK purtem dang nungi alizük. Meghalaya government-a kasa telok dang nungi tawa ambulance gari 25 alizük ta angazüker.



Hailakandi, April 30, 2020: District administration, health functionaries aser police personnel tem pei kinungertem den quarantine center toktsür pei kidangi meyipa aoba noksa nung angur. Coronavirus tashidak agi asüsang Foijul Hoque Barbhuiya' er kinungertema anogo 24 quarantine asüba sülen yokogo.

Gauhati HC-i Mizoram sorkar nem tetuyuba agütsü

Aizawl, Rongchii/April 30 (Agencies): Gauhati High Court Aizawl bench-i Bodhbarnü Aizawl district deputy commissioner aser superintendent of police dang April 25 nü asangur chanu ti dak local level task force volunteer temi teka sangshiba osang hopta ana tsüngda agütsütsü asoshi tetuyuba agütsüogo. Item asangur chanu tem ya state mokdanga yur aliba tetuyuba sülen manidakba atema merenshi.

State chief secretary, home secretary aser Covid-19, Dinthar local level task force mendenbuba densema respondents tenet dang hopta ana tsüngda iba tatalokba osang agütsütsü tuyu aser ano parnoki kechi jenjang agi aser tarutsü nung iba amala timtem mataloktsü asoshi kechi jenjang agütsü lemteta ali, iba indang osang agüjang, ta Gauhati high court judge Justice Michael Zothankhuma-i agütsüba tetuyuba nung shia lir.

State mokdanga aliba mapang tashi mangai senzür asangur chanu ti ya Dinthar

local level task force volunteers temi April 25 nü apu.

Dinthar ya state yimtiba anüolen kanga nungtugu tesem ka lir.

Iba tatalokba sülen anogo ka lir Facebook aser Whatsapp amala social media sabang balala nung volunteers temi asangur chanutem dak azükba aser amaba video ka temai adokba sülen iba ken o jangjaa aküm.

Dinthar local level task force nungi sangdong ka ajanga Mongolbarnü ashiba agi, asangur chanutem ya ganja chia lia apu aser aji dang masü coronavirus tashidak prokshia meyoktsü asoshi state ajung mokdanga ayuba sülen parnoki manidak.

Media balala nung osang agütsüba aser local level task force sangdong dak ajemdaker iba ken o ya okadak ajanga agizükogo.

Okadak ajanga ashiba agi ken o asadangba sülen Constitution, Article 21 nung aibelenba ngutetogo.

Okadak ajangasa asangur

chanutem ya police nem agütsütsü asü ajita mesera parnok temesepba mozü mesera ganja achiba putetera excise officials nem agütsütsü asü, ajita asünungdang parnok Narcotic Drugs & Psychotropic Substances (ND&PS) Act, 1985 kübok okadak o bendangtsü.

Kasaji curfew mesera state mokdanga aliba tetuyuba sülen manidakra aibelenertem nem temzüng ozüng kübok tapet temerenshi agütsütsü asoshi police nem agütsütsüla.

Maneni okadak ajanga ashiba agi, state respondent-i local mesera village task forces inyaksagshitsü asoshi arlla tejangja lateta toktsütsüla ajita asünungdang parnok liromedema inyaksangshitsü aser state nung coronavirus tashidak nokdangtsü asoshi sorkari jenjang balala agia aliba nung tetsükdaktsü madoktsü.

"Local level task force temi mapa tajung inyaka arua aliba ya nisung kari temzüng ozüng pei mulungka nung amshiba ajanga memenentsütsüla," ta okadak ajangsa ashi.

Tripura cabinet-i 'neighborhood classes' tenzüktsü telemtetba agi

Agartala, Rongchii/April 30 (Agencies): Linük ajunga mokdanga aliba mapang kaketshirtem nem maneni shisatsü agütsütsü asoshi online aser televised/aired classes achaayanga agiba den bendenloksema ano 'neighborhood classes' agütsü asoshi Tripura nung state cabinet-i telemtetba agiogo.

Iba neighborhood classes nung tesayur kati school melapok tashi kaketshir timba agi pong dang sayutsü.

Education Minister Ratan Lal Nath-i ashiba agi, state

education department-i school tesayurtem dang iba inyakyim nung shilem agütsü asoshi mepeshia asüngdangogo.

Minister-isa, state nung tesayur meyirejang 29 shi lir aser tesayurtem timba kati telangzüba tajung agütsüogo, ta ashi.

Kasa mapang nung 'neighborhood classes,' tenzüktsü asoshi terenemshiba ka ama state Education

Department-i SAMAGRA SHIKSHA Abhiyan kübok schools aser Madrassas kaketshirtem nem angati agi

textbooks agütsü tenzükogo.

Manipur-i pei talidaki marutetet atema bus pezü yok

Imphal, Rongchii/April 30 (Agencies): Pei pei talidaki moteti alir passenger 84 anir arutsü asoshi Manipur sorkari Guwahati-i bus pezü yokogo, ta sangdong ka ajanga metetdaktsü

Tang item passanger 84 ya Guwahati kübok Manipur Bhavan nung mungdar.

Iba maparen dak sendakba nung, senzüsönongtsü asoshi Bodhbarnü State sorkari temelaba (transit/movement pass) ka agüja liasü.

Driver aser handyman ka ka dena odaktsütsü temelaba agütsür aliba bus pezüprongla ya Bodhbar anepdang 5:30 ako meta Imphal nungi ayamesoa liasü.

Pai talidaki motet alir passenger 84 aser Manipur Bhavan, Guwahati nung amshitsü

General Administration Department (GAD) aser Transport, Principal Secretary, P Vaiphei-i hand sanitiser pungdang 500 den tejak nembangba mask tem agütsüogo.

Imphal nunga bus pezüprongla atema driver tem nem tajemtzü tzü agüja liasü.

Kasa mapang, tenokdangba mesüra mepetmesü kecha meli item bus senzüsönongtsü

atema check point shia nung osang metetdaktsütsü asoshi Manipur Police-i Assam Police aser Nagaland Police naprongla dang mepishiogo, ta ketdangser sangdong ajanga metetdaktsü.

Manipur Health Department indang Additional Director, Dr. Khoirom Sasheekumar Mangang-i ashiba agi, passenger 84 ya May 1, 2020 nü Manipur State tonga arutsü.

Item passenger ya anepdang 6:00 ako nungi anüngdang 12:00 tsüngda Mao Entry point nung agizüktsü.

Passenger rongnung coronavirus tashidak temaitsü keta alir kar dak danga lira, parnok ya RIMS (Search ResultsRegional Institute of Medical Sciences) aser JNIMS (Jawaharlal Nehru Institute of Medical Sciences) nung anepalutsü, ta kasa sangdong nung shia lir.

Kasa mapang, iba tashidak temaitsü malir passenger temji, COVID-19 inyakyim agi melaba ama tendangtsü atema Imphal kübok quarantine centre tem nung ayutsü, ta sangdong ajangasa metetdaktsü.

Iba tashidak malirtem pei pei kidang quarantine süa ayutsü atema yoktsü.

Ayong nung arakseta asür mang ka ngutetogo

Guwahati, Rongchii/April 30 (Agencies): Anüdoklen Kameng district kübok Seppa nung Wonderland Residential School indang Managing Director, Atom Ratan, shiba April 26, 2020 nü külem inyaker (Anand Topo) den tzü nung arakseta asü, pa (Atom) tasü mang nguogo, ta sangdong ajanga metetdaktsü.

Atom tasü mang ya JNV (Jawahar Navodaya Vidyalaya) School anasa Kameng ayong anüolen tsütsülen ngutet.

Deobarnü, Kameng ayong nung Ratan den külem tesayur Anand Topo naprongla iba ayong nung arakseta taküm sama.

Iba ayong nung tena ango pua aliba mapang lendong ya

ataloka liasü, ta tenük küli angutsürtem sangdong ajanga metetdaktsü.

Medical inyakyim agi melaba ama, Tobo mang ya mozüki nung anepaluba sülen pa tasü mang ya kinunger nem bendanga agütsü.

Tobo asüba ya masütsü yim agi (unnatural death) asü, ta shia police-i ken o ka benokogo.

Ajisüaka, Ratan den külemi tzü nung arakseta asüsang Anand Topo indang mangbo tang tashi menguteti lir.

Atom aser Anand na tzü agi abonger bener aoba/ tzü nung arakseta asüba osang police nem metetdaktsüba sülen tena mang bushitsü atema maparen tenzükka liasü, ta kasa sangdong ajanga metetdaktsü.



Agartala, April 30: Coronavirus prokshia meyoktsü asoshi sorkari linük ajunga mokdanga yur aliba mapang Agartala nung Brehostibarnü aluyimertem mask semer alu nung inyakba noksa nung angur.



TIR YIMYIM YIMOBILEM (EDITORIAL)

DIMAPUR ROGONÜ, MONUPII (MAY) 01, 2020

Lanurtem nem kechi inyakdaksütsü ?

Tang, India dena, alima ajunga nung taneptsü mozü magütsütetba tashidak tesashi ka poktetba agi, aji nokdangtsü atema India nung nisung shinga kolenia moudaktsü aser kecha meinyakdaksüi kidang mongdaksüba anogo 40 jungogo. Atangji, Khristan-tem asoshi anogo 40 ya kanga tetezü aketba zünya ka lir, anungji anogo 40 sülen yabo tüzümsüing amai ano lendongang tulubaka arutsü asü mesüra tatidang timtem ajak süitemer ano akhi ama pei mapa tenzüksü asoshi tashi tasen ka angutsü ta rataba mapangji tang ya lir. Atangji, tashidak wara ya yakta süitema aotsü imlar aser asenoka kidangsa monga kazü nung, chiyongtsü makatsü, anungji yawara adenloksü. Ano, tebilemstü kaji India tesem balala nung Naga nunger lanurtem mapa tapu balala inyaka aliba purtem aika mapa makai kumogo, anungji kodang linük ajaklen senzusenpongtsü meladir, idangjibo parnok ajakji mapa maka meyipa arutsü. Tanga Nagaland nung telidak lanurtem aika mapa mengui kazüba purtem jenti lir, anungji ano bendanglen mapa inyaka alirtem ajak meyipa arunungbo Nagaland ya lanurtem mapa maka kazüba lima ka kumadoktsü. Iba tebilemstüji yimdangi arua tang yongi state government-i shisalen teyurtem den shisalemsatepa mapa inyaksüba tesem kar yateta metenzükra, ano Nagaland nung meimlaba lendong timtem mapang arutsü ana nung lir. Atangji, iba tebilemstü ya Nagaland nung dang masü saka state ajak nung ataloktsü, kechiyong alima tensa agi, joko, nisung ajak pei kidang alitsüsa akümer. Ano, mapa teimbaka online akümer asünungji, tiyazü tenüing amshia inyakba mapatem aika meinyakteti anenadoktsü. Iba tebilemstüji yimdangi arua anguba agi, Assam nungbo taoba hopta Assam Chief minister-i par state nung wadang balala nungi shisalen teyurtem jadena lanurtem mapa maka meyipa arurtem nem mapa agütsütsü asoshi lenmang bushia shisalemsatepba sentong ka ayongzüka liogo. Iba sentong nung, Assam Chief minister-bai ashibaji, tang Covid19 tashidak wara ajanga India tesem balala nung mapa tapu balala inyaka alir Assam nunger lanurtem lakh ter shi mapa maka meyipa arutsü, ajisüaka asenok asoshibo parnokji khuret masü saka wadang balala nung mapa inyak ashirtem asütsü, anungji Assam asoshibo parnok arubaji temoatsü aser teyarir arur amai asütsü. Iba o nungji asenoka tebilemdangtsü aser teinyaktsü mapa karbo angatetter. Assam nungbo tangalen nungi mapa toktsür lanur lakh ter arutsü ta parnokki asadangtetter aser itemji atemaji khuretsa mebilemer, kechiyong parnok kolok aser shisatsü agi tonga lir. Ashiko, Assam nung amaji Nagaland government-ia India tesem balala nungi Naga nunger lanurtem mapa maka kümer kwishibo arutsü ta repranga asadanga alitsüsa akok. Aji oda, tatishitsü agi, Naga nunger lanur meyririjang ter mapa maka kümer Nagaland-i asüing meyipa arura, parnokji Nagaland asoshi tajangzük asütsü asü mesüra khuretang ka asütsü (?) ta government-i dang masü saka asenok ajaki shisadanga lenmang bushitsüba kanga nungdaker. Joko, ita sen achitsü kija atemabo government mapai manioktetsü, anungji lanurtemji private mapa balala nung inyaksüsa lenmang lapoktsütsüsa adoktsü. Item lanurtemji kar hotel nung, kar call center balala nung computer amshia inyakerter asütsüsa akok, karbo dokan nung amenertem asütsüsa akok, ano karbo kaketreju aser company balala nung inyaker asütsüsa akok, item ajakji Assam Chief ministerbai ashi ama, mapa inyak ashirtem dang lir, anungji alima asoshi khuret masü saka teyarir tajungtem lir. Atangji, parnok karbo peisasa mapa bushia inyaktetsü saka parnok aikati peisasa mapa mebushitetsüsa akok, anungji state government-i private sector balala nung inyaksüsa maparen sayutetsüla. Iba mapa atemaji tongtibang aser nungdakba department-tem nungi tongti purtem agiteta telok ka, 'Employment Task Force' ama ka kümer shisa bentepa lanurtem asoshi mapa inyaksü lenmang bushia atatsü rongdak nungdaka kumogo.

OLEMSABANG TEJEN PUTIPUYANG NUNG TANÜ TENSA

- Süpongnügang Longkümer,
Darogapathar Dimapur

Kibong nung jala japasutemi tsurapor mulung koremdaktsü dang tsuraportemi kodanga bei chirtem atakatem masür saka hüm ta temulung nenzüka meyoktemer, saka jala japasutem shibai tsurapor mulung kanga koremdaktsütir bei sasa temoatsü piladaktsür. Saka Tsüngremi meimchir atema koba jizüing ozüing renema yutsü, aji memelenshir saka teti kasa tang alitsü. Levi tapu 18: 22,23 nung Tepor shingia tepor den memetemtsüla ibaji Tsüngremi sembar.t 23 tepor süshia tetsür süshia shingia shiruru den memetemtsüla aji tesembatsü lir.Dan ya Yakob chir aser Manase aser Efraim tena ya Yosef chir saka Yakobi Yosef dang tena ya kü chirtem senmang rongnung züngsemte saka tanünga ajakji nü chirsä alitsü. Ezekiel 48 Yamaji Yakobi bei chirtem atema ali senmang lemsatsü dang Manase aser Efraim tena züngsema parnok ajak nem lemsatsü, saka Reubeni tepo yipdeni atu nung Tampo senmang Yihuda nem lemsatsü JA 7:5 nung angutsü. Tanüla temeshi tsütsü kidongren temaitsü ajentsü dang Dan aser Efraim parnok kidongren nung tenüing mezüngok, maden. Kechaser tenati sünyanglu külem nung taküm kaket nungi aidok T kunem 29: 20,21 nung tejangja angur.Asenok Aortema khrista magizükertem dang Alimapur, Limapur ta jaa aru. Tetezü alima senmang angurtem tanüla temeshi lenmang nung malirtem parnok dang meimchir ta majar. Meimchirtemji Tsüngrem lenmang nung jajartem dang tang ajar, iba o ya JA nung teranapen tashi shia angur JA 3:10, 6:10, 8:13, 11:10, 12:12, 13:8,12,14, 14:6, 17:2, 8. Na kibuba nung alir asü alima yimya nung alir item taputem nung asen jangjatsür. Tenlaki shipanger lima ,aser ayokertem shir, Atsüapong mependangertem shir, Tenlaki raksaja temeshipur tepseter shir, Khrista tenüing atemer khristanpur rishikangshia tepseter shir, khristan telok rongnung itemi lir.Iba ama limatem dak Tsüngrem ain adoktsü akok Isaia 63:1-6.

Asen Aor tamangtirtem ajanga 1976 nung asentenshi adokdaksür kelen Naga lima tang masü kin aika nung asentenshi adokdaksüba mapang temeshi tanüla agi ajenba Tsüngremi odangpo maidoker Efesa 1:13,14.. Yisu dak amangerji temeim, taremsük aser ochi lira aji teperi. Tanü Naga lima nung kin ajak nung khristan timba aser tanüngbapurtemjia temulungjang nungpo sünyanglu külema alitsü akok saka sünyanglu shidakba yanglur külemerpo mali, anungji sayutsüngitsü nung timtem mali, kipa lembuba nunga karpo kanga mejunge alitsü akok saka aji bei tebilemstü saka aikati kanga kumtanga kipalempuetepeba ya Tsüngrem tsüngdanga tasüngtet asütsü südi.Naga lima nung ochi mashiba temenen mapa aika lir,saka sünyanglu külemerpo kin kar nung züngteta tera alitsü akok saka item ajagi makok aser parnok nema Tsüngrem osang agüja makyonga odage. Anungji tanü alima ajonga wara ka agi makmakshishidaktsü dang asen lima telongtet nung tang masü alima ajak nung Naga nunger liaka tanü tashi osang tamajung mali, Iba den lockdown tenzükle nungi tasü tamar kanga ajemer aser koda masü shirangera mangashir. Iba tatalokba yagi Tsüngrem tenüing asangtsü kanga nungdak aser tamang jenjang yanglushitsü kanga tongtipang ajitetba lemsateper.Tazünger aser tangateter ajak dang khrista temeim salem den temoatsüba sangma.

TAKÜM O JI TESÜNGMANGTSÜ

- Süpongnügang Longkümer , Darogapathar Dimapur

COVID-19 wara agi India ajunga shipangba ita ka mejungjai atalokba kar lemsatepnür ,saka tamasa amangbapur ajak dangi Khrista temeim salem metetdaksür.Covid-19 agi alima nung advance lima (Suber power) nung alibatem Corona virus agi makyonga aser makdoka arudang aoksa ka ano kibong ka ki kecha makizükete rongdok, anungji anogo ishika lir külen kibongji semtangi oaba mapang kironngji repranga senzüdang kisen rongsa jana ajak nangtena aliba nung kaket ka ataloka aliba pena aru nung aji Laishiba liasü. Anungji aji lapoka reprang nung temakep tzu agi tera metener saka telongji khen agi tarak maket tesüngmangtsüka liasü. Kisen (Ki senti oset) ajak rongdok asünung Laishiba meronge akatsüba kiji meyimlaba mapa liasü.Lendong mapang Laishiba kodanga maronger mesüra meraksar ta jembibapo angashi saka tenük agi ngua majurutangba ajurua Tsüngrem tenüing sanga liasü. Haliluya

Alima ajunga wara ka asoshi scientistemi mozü meyanglutet makdodaktsüba mapang joko nisung ajak bei kidang shibangera ano temang ajak tzu chikoa shidoker kazütepba agi tang taküm kumzüktsü, anungji amangbapur shinga tekülemi maotsü bei kidang tang külema mongtepti ta mongtepber, chia mejeme alitsü makoker. Anungji mapang mapang bazarpö lapoktsür, nungdak jajadaksür, idakji tamanger mamanger ajak oset raktepber kechaser idakji corona virus mali iba denji Policei nüka alir anungji kecha metsüpur anogo ana asem adonga bazar len senzür Corona virus agi madonger. Saka Tenla kidangpo corona virus lir; idakji tanüker mali; Tangar lima nung nüpur ajak kidang ajemajema, lir,saka ration ajak dokan kipuri ki donga penür arua kima yutsür aser aji mapang apir tapeni aor iyongjia aika mekümzüker. Laishiba mi agi merongdokra meimchir taküm Tsüngrem dak amangertem tanüla temeshi i temaitsü ajenbapur kecha wara aser lendong agia mekongshidaktsütsü Tsüngrem tenangzükba. Efesa 1 : 13,14 JA 14 :1. Laishiba dak amanger asü? March 11 2020 Malkangiri, Odisha nung Kama Soti aser pa kinüngtsü Bima kidang khristan telok tekülem agiba agi merenshi aser khristan yimsüji dokjang ta merenshi saka manga. Kinüngtsü Bima jagi lokdi dang; nenoki onok tepsetyongpo onoki Khrista medoktsütsü ta tasüita nangzükba angashir. Yisui kumzükbaji yamai tang kumzüktsü kechaser Nagaland telongtet nung tang masü Forigen lima tashi nungi osang tajung tang, Yohan 2o: 28,29 Tomai Yisui manguba agi mamang saka angu nung langzü "Kü kibuba aser kü Tsüngrem" 29 Yisui Pa tang ashi, "Nai ni angu nung tangpo amanger asü? Shiri mangu aji saka amangogo parnok tepelatsü."Asenok dangpo jangja jangja metetdaksüogo saka mamanger. Yer 8: 6 Kibubai tenarong tena anga liasü, saka parnok shidak mejembi; ta asenok danga shira koda? Alima shisa taka o aser osangpo aika angashir aji shidak, Math 16:27 Saka asen Kibubai ashir TETSÜPU KÜ DAK AMANGANG. t 30, 31Peteri Yisui tüzuma nung jajaba ngur paia jaja saka mopong ngur tsüpu nung telongi tair lia Yisui ashi oh tera amangba nisung kechiba nai atedaker ?Aoripo Tenlaki ajak lapoker tsüngtsüing dema ozü lima ozü Tsüngremi kumzükogo Haliluya ta YISUI MEMETETBAPUR DANG TSÜNGREM KULI ASÜ NUNGPO TSÜNGREMI KODA PELALA ta bilemer,kechaser timtem tanen mekai arujen aru nung idangjipo tenlaki nung mekülemtsü mapang asütsü.Küm tenet rishikangshi mapang nung ataloktsü Yisui Math 24, Mark 13, Luk 21 nung ashiba angur. Tazünger ajak Tsüngremi moajang.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Kohima yimti nung CBCMHK-i aonsotsü angati lemtsüogo



April 29, 2020 nü PHQ junction, Kohima nung nisungtemi angati aonsotsü lemzüka noksa nung angur. Item aonsotsü ya Chakhesang nung yim asemi tenla aser iba maparen ya CBCMHK-i achaayanga inyak.

Kohima, April 30 (TYO): Coronavirus tashidak prokba nokdangtsü atema India linük tesem ajak shibanger aliba mapang nung nungdabapurtem yaritsü asoshi Bodhbarnü (April 29) PHQ Junction, Kohima nung Chakhesang Baptist Church Ministers' Hill, Kohima (CBCMHK)-i Kohima yimti nung alirtem nem aonsotsü angati lemtsüogo, ta CBCMHK

Media & Publicity Committee nung züngsem, Kuzhovesa Soho-i sangdong ka ajanga metetdaksü.

Kiyong 16 nung kibong aika jangiateta aonsotsüji kidangi tsüngdong oa agütsü.

Media & Publicity Committee, CBCMHK-i ashiba agi, aonsotsüji Chakhesang nung yimtsüngtem-thuvopisu, K. Basa aser Porba

nungi anepdang bener aru aser Kohima jila nung nungdabapurtem nem lema agütsü. Item aonsotsüji yim asem jagi angati tenlaba liasü.

Iba dak sendakba nung CBCMHK nung Pastor, Rev. Dr. Vevo Phesao-i item yimtsüngtem nung alir ajak dang pelaba lemsatep.

Phesao-isa jila/yimtittem nung alirtem dang Naga lima ya süngdonglidong aser arem shiruru tsütsü takar lima ka lir, anungji itemji wazüka ayutsü atema akokba tashi lenmang balala ajanga yariang, ta mepishi.

Tang coronavirus tashidak tensa mapang nung yimtsüng nung alirtemi nungdabapurtem yaridar, ta shia Rev. Phesao-i, yimdaklirtemi Nagaland nung aliba jila aika nung nüburttem nem aonsotsü agüja yaridar, ta ashi.

Paisa nüburttem dang, iba tashidak nungi jenbua alitsü atema sorkar tetuyubatem tashi angatsüla aser nüburttem tsüngda temeimtep, aria bilemba alitsüla aser Tsüngrem nem ajak bendanga agüja iba tashidak nungi anepjang ta sarasademtsüla, ta ayongzük.

Aonsotsü angati alemba maparen tenzüka Phesao-i sarasadem aser süisüpongertem nem aonsotsü lenja liasü. Police densema lisopor aser tzümar nem angati aonsotsü lemtsü.

Iba sentong nung CBCMHK Arogo nung inyakertem aser AYO Volunteers dena liasü.

USCIRF-i black list nung India züngsemtsü benok

April 30, 2020: US Commission on International Religious Freedom (USCIRF)-i US State Department dang tamangba yimsü temeden alema inyakba linüktem black list India linüka züngsemtsü benokogo.

Tamangba yimsü sadoka amangtetba onüktem nung White House, State Department aser Congress nem shisatsü agütsütsü atema USCIRF nem mapa nunglokja lir. Iba tentet nung züngsemtemji tamangba yimsü tsütsü meimchir temeden atema inyakertem aser shisashirtem densema lir.

Sangdong ka ajanga USCIRF Vice-Chairman, Nadine Maenza-i, "Linük kar nungbo temelenshi adokdar saka linük kar nungbo tamangba yimsü ajak sadoka amangtetba jenjang tamajungba akümer," ta metetdaksü.

Ajidoda USCIRF-i tamangba yimsü ajak sadoka amangtetba alema inyakba tsütsü linük 14 züngoktsü atema State Department matsüngdang benok.

Tang tashi nung State Department-i linük teku: Burma, China, Eritrea, Iran, North Korea, Pakistan, Saudi Arabia, Tajikistan aser Turkmenistan linüktem CPCs nung züngoka lir.

USCIRF-i parnok indang report nung shia aliba agi, linük tekujji ano maneni CPCs nung züngoktsü atema benok aser Vietnam, Russia, Syria aser

Nigeria linüktema CPCs nung züngoktsü atema benokogo. Taküm India-a USCIRF indang CPC nung züngoktsü atema list nung densema lir.

2009 küm nungi USCIRF-i India linük ya "Tier 2 country of concern" nung züngoka liasü.

Osangbenertem den jembidang Maenza-i, "2019 küm tamangba yimsü ajak sadoka amangtetba jenjang tamajungba akümbaji India liasü, iba linük ya alima nung democracy tulutiba linük lir," ta metetdaksü.

USCIRF Chairman, Tony Perkins-i, "Commissioners timtiba kati India ya lenmang mashileni odar ta bilemer," ta metetdaksü.

Osang angazükba agi, 2019 küm India nung Khristantem anema inyakba kanga bulua liasü; 2019 küm India nung Khristantem anema inyakba tatalokba 328 tashi liasü.

Commission-i ashiba agi, India nung tekülem sentong tagidak mapang nung timtem aiben agütsüogo aser Tenla kitem raksatsüba tatalokba aika liasü.

Yaküm Christian group ADF India-i ashiba agi, 2014 küm nungi 2015 küm tsüngda India nung Khristantem reshikangshiba tatalokba 1,000 dak tema liasü.

Ano India nung United Christian Forum-i ashiba agi, taküm küm tenzüker January ita nungi March ita tashi nung India nung Khristantem

amokmerenba tatalokba 56 liasü aser Khristantem anema inyakba tatalokba 78 liasü.

USCIRF-i, "2018 küm Supreme Court-i Centre aser state sorkartem dang loktii nisung tepsetba anema ozüng tesashi yanglutsü metetdaksü. Central sorkar aser state 10-i iba tetuyuba tashi mangaba ajanga 2019 küm July ita nunga Supreme Court-i maneni kasa tetuyubaji agüja liasü," ta metetdaksü.

"Tashi angatsü melen Home Minister, (Amit) Shah-i tang aliba ozüngtem yagi teperi ta ashi aser linük nung loktii nisung tepsetba tatalokba kanga bulua akümbaji pai magizüker. Ano külen Home Ministry-i National Crime Records Bureau dang 2019 küm crime data report nung loktii nisung tepsetba data bo meinoktsü tuyua liasü," ta USCIRF-isa metetdaksü.

India nung BJP-i aniba sorkari tasü itdakja Hindu yimsü alia amangertemi tamangba yimsü ajak sadoka amangtetba jenjang raksatsüba dak sendakba nung US nung opposition-i ola madokba ajanga religious advocates-i teblemtsü akaba mapang nung USCIRF-i India linük CPC linüktem rongnung züngoktsü benoker.

Alima nung Khristantem reshikangshiba linük tamajungtibatem tarensen nung India jenjang 10buba nung lir (Open Doors USA).

ANO GO ABEN TSÜNGREM DEN

TEMOATSÜTEM SEMPET

"Idangji parnok tenük lapoka adok, aser parnoki pa metet". Luke 24:31

Lemang tepiyong Pa tanela tangu parnok mulungjang nung apuokja Yisui nütsüngtem den jaja; saka Pa parnoki mungui mao tasi parnoki Paji Yisu ta memeteti liasü. Kasaji asenok den aser asen temoatsü tajungtiba den lir. Itemji pilaa mao tashi asenoki anema alibaji maküm tashi parnoki Paji Yisu ta memeteti liasü. kasaji asenok den aser asen temoatsü tajungtiba den lir. Itemji pilaa mao tashi asenoki memeteti alir. Temang mejungi maküm tashi asenoki anema alibaji maküm tashi asenoki anema alibaki mesüshir; anebalu masür. Telungjemi ketasena malir. Ki makai maküm tashi kiji anebalu masür(old fashion).

Asenok tembartem den kasaji lir. Asenok parnok dak tobur tajung jakla ali aji mangur, mesüra parnok dak aliba sempet tajungji parnok den mapila tashi mungui süidaktsür. Talisa ibai asen anasa alirtem den ataloker. Parnokiji teti ajurutepa alitsü ama bilemer, kechiaser parnok teti asen jakdang oli aruli ta senzür. Parnok teyari kanga tongtipang, aser parnoki tenzükbaji metangdangi lir, aji asenoki mangur. Saka kenü asenok tembar kar asenok nungi piladoktsü. Metettepa aliba tejak tu mungui akümütsü. Temeim ola tanük to mangashitsü. Mokorai, ajemalua tenzüka to anenedoktsü. Asüng asenoki tembar majurutsü; idangji Pa aliba metettsü.

Küm tom tashi arudang asenoki iba nungi lesson ka magitsü na? Asenok den temoatsütem alidang itemjijenjang ket magizüktsü na? menden tazungji temeimba tembar ka mezüngbuba jungkai adoktsüba mesüdaksütsüla.

MP nung süng-long külemer tribal nisungtemi pastor ka dak azük

April 230, 2020: Madhya Pradesh nung süng-long ola anendaksütsü," ta külemer tribal nisungtemi amokmerena liasü," ta paisa ashi. pastor ka ki raksatsüba sülen Tarutsü nunga pa anema par kibong aremlen mindokogo; inyaktsü tsübuba agi tamasabo parnok pastor dak kanga Kirade-i police nem ken o mejungi azük aser sayutsüngiba anendaksütsü atema trok-zü rangdoktsütsü, ta amokmerena liasü.

Pastor Lalu Kirade-i lijaliyongba sülen kidangi meyipa aruba mapang nung Laxman ta ser nisung ka densema nisung teneti pa dak azük, tekong nung alen aser long agi aon.

"Azü telok kati amaker ama parnoki ni anema inyak, parnoki kü dang 'Ner Tsüngrem dang kümzükang ta shiang' ta ashi," ta paisa metetdaksü.

"Ano Laxman'er kinünger kati kü dang, 'Ner Tsüngrem dang teyari meshia ayimdenang. Nai trok-zü amshia sarasadem aser

sayutsüngir, anungji tanü ni nü nung olala anendaksütsü," ta amokmerena liasü," ta paisa ashi. Pastor ka ki raksatsüba sülen Tarutsü nunga pa anema par kibong aremlen mindokogo; inyaktsü tsübuba agi tamasabo Kirade-i police nem ken o agütsütsü arendak, saka Khristan lenirtemi pa ajungshiba agi pai tribal nisungtemi anema ken o agütsü.

March ita nunga pa anema inyakba atema pai Pandhana police station nung ken o benoka liasü saka police-i aibelenertem anema kecha meinyakba ajanga tan ita nunga parnok pa anema inyak, ta paisa ashi.

Tan tatalokba atema Pastor-i Jhirniya police station, Khargone District nung ken o benokogo.

March ita nunga Laxman leniba nung tribal nisungtemi kibong ka yimdak nungi mindoka liasü.

OLONG PAITEP # 5443

1		2		3		4	5			
				6						7
		8								
9				10		11				
			12						13	
						14				
16						17				

TIPILEN		LANGTSÜNGLEN	
1. Nisung jenti	- (5)	1. Tenük telong	- (9)
4. Tsük rudenba	- (5)	2. Committee dang ajar	- (5)
6. Temzüng tesashi	- (5)	3. Yagi ki okdoker	- (7)
8. S_ _ _ i	- (3)	5. Yim lenmang	- (5)
9. Nisung rongnung telemsa	- (3)	7. Temoatsü keter meyipa aruba	- (9)
10. Anogoshi	- (4)	11. Kanga junga menemba	- (7)
12. Ajanga aor	- (4)	12. Kenyongi majinü	- (5)
13. Tsük rizüngdak	- (3)	13. Rong kanga tulu	- (5)
14. Tebang nungi adokba	- (3)		
16. Süngdong tatembangtiba	- (5)		
17. Meputep	- (5)		

OLONG PAITEP # 5442 TELANGZÜBA

TIPILEN :		LANGTSÜNGLEN :	
1. Tanga, 6. Wara, 7. Rajang,		2. Anga, 3. Yabang, 4. Tarok, 5. Orak,	
9. Anük, 10. Jenjang, 11. Alar,		8. Ainer, 9. Anema, 10. Jabili,	
14. Ngashi, 15. Nala, 16. Mechi.		11. Among, 12. Miim, 13. Anem.	

2020 APRIL ITA LILI RESULT !

April ita nung Lili tajungtiba (First) shimteta tanü yangi lephsia agütsür. Lili zülur-i May 10, 2020 tashi nung Tir Yimyim Office nungi senpet agizüksü mepishia metetdaksür.

LOCKDOWN MAPANG SOPANGBA TEPOK TALI CHIZÜKBA

AJANGA NEMNEMER :

Lockdown maparen ya maneni ora tola nung button o button na tsüngda nunga social distancing tenzüksü ana nung dang lir!!!



TANÜBO NAI LANGZÜANG

Q. Public Enterprises Selection Board (PESB) indang chairperson shiba shima liasü?


A. Abishek Patel B.Rajiv Kumar C.Tony Charles D.Dinesh PK

_____ (Taruba adok nung onoki langzüksü)

YASHI ADOK TELANGZÜBA : 1973

NAI-A YA METETTER MA?

BOLLYWOOD ACTOR TEJEN ASER ASÜR RISHI KAPOOR INDANG NÜNGTUGU FILM KAR:

1. Karz	(1980)	
2. Bobby	(1973)	
3. Do Dooni Chaar	(2010)	
4. Khel Khel Mein	(1975)	
5. Sometimes	1976)	
6. D-Day (I)	(2013)	
7. Kapoor & Sons	(2016)	
8. Amar, Akbar and Anthony	(1977)	
9. Laila Majnu (II)	(1976)	
10. Saagar	(1985)	
11. Yeh Vaada Raha	(1982)	
12. Prem Rog	(1982)	
13. Destiny and Fate	(1981)	
14. Nagina	(1986)	
15. Hum Kisise Kum Naheen	(1977)	
16. Chandni	(1989)	
17. Love Nowadays	(2009)	
18. Deewana	(1992)	
19. Mera Naam Joker	(1970)	
20. Agneepath (2012)		
21. Namastey London	(2007)	
22. Damini	(1993)	
23. Khoj	(1989)	
24. Zamaane Ko Dikhana Hai	(1981)	

SUDOKU # 5485 TELANGZÜBA # 5484

3	9			1	7				4	7	6	5	2	8	1	9	3
7		4						2	2	8	1	7	9	3	4	5	6
2				5		9	7		9	3	5	1	4	6	8	2	7
	7	9			2	8	3	1	7	9	8	6	5	2	3	1	4
5						6			1	5	4	8	3	9	6	7	2
		6	8		4				6	2	3	4	1	7	5	8	9
8		2			3	7			8	4	2	9	6	5	7	3	1
	1			9	8	5			5	6	9	3	7	1	2	4	8
		7					8	6	3	1	7	2	8	4	9	6	5

OJANG LUTEP # 5033

KTLOI	:	<input type="text"/>
SDEENN	:	<input type="text"/>
UNNG	:	<input type="text"/>
IPE	:	<input type="text"/>
ILEBMBA	:	<input type="text"/>
NGDAJI	:	<input type="text"/>
AGÜLITSA	:	<input type="text"/>
AT	:	<input type="text"/>
OKNDAJAKBI	:	<input type="text"/>
ENTEMEN	:	<input type="text"/>

OJANG LUTEP TELANGZÜBA # 5032

TAJUNG NUNG SHILEM TILAKA DANG AGIYONGJIA IBAJAGI TEMELNSHI TULUKA ADOKDAKTSÜTSÜ

TAN HOPTA ATEMA - KOMA SÜLA ?

Q. Nagaland nunga government aser private school nung azünger ajak schooli moi kidang nungi dang küm piyong online class agitsüsa aküm nungbo koma süla ?



Ranchi, Rongchii/April 30, 2020: Brihostibarnü Ranchi nung coronavirus tashidak tensa atema doctor tem rongdak senden ka nung adenba noksa nung angur.

India nung nisung ajak agi 33,050 dak Coronavirus putetogo

New Delhi, April 30 (Agencies): Tesüiba ghonda 24 tsüingda India nung coronavirus tashidak agi nisung 66 asüba sülen Brihostibar tashi nung India nung iba tashidak agi asür ajak agi 1,074 jungogo aser tang tashi nung nisung ajak agi 33,050 dak iba tashidak putetogo, ta Union health ministry-i metetdaksü.

Tang coronavirus tashidak agi shiranger 23,651 lir, nisung 8,324 bo anepogo aser ka bendangleni ogo. India nung iba tashidak puteter rongnungji bendanger 111 densema lir, ta Health Ministry-isa metetdaksü.

Bodhbar aonung nungi Brihostibar nikongdang tashi nung coronavirus tashidak agi

asür 66 nungji Maharashtra nungi 32, Gujarat nungi 16, Madhya Pradesh nungi 12, Uttar Pradesh nungi asem, Tamil Nadu aser Delhi naprongla nung anana aser Karnataka nungi ka densema lir.

Tanep Health Ministry data ajanga ashiba agi, linük nung iba tashidak timtiba putetba state ji Maharashtra (9,915) lir, iba sülen Gujarat (4,082), Delhi (3,439), Madhya Pradesh (2,561) aser

Rajasthan (2,438) lir. Tamil Nadu nunga nisung ajak agi 2,162 dak iba tashidak putetogo; Uttar Pradesh nung nisung 2,134, Andhra Pradesh nung 1,332, Telangana nung 1,012, West Bengal nung 758, Jammu & Kashmir nung 581,

Karnataka nung 535, Kerala nung 495, Bihar nung 392 aser Punjab nung nisung 357 dak iba tashidak putetogo.

Maneni Haryana nunga nisung 310 dak coronavirus putetogo, Odisha nung 125, Jharkhand nung 107, Uttarakhand nung 55, Chandigarh nung 56, Himachal Pradesh nung 40, Assam nung 38 aser Chhattisgarh nunga nisung 38 dak iba tashidak putetogo.

Andaman & Nicobar Islands nunga nisung 33, Ladakh nung 22, Meghalaya nung 12, Puducherry nung 8, Goa nung tenet, Manipur aser Tripura naprongla nung anana aser Mizoram o Arunachal Pradesh naprongla nung nisung kaka dak iba tashidak putet.

Sensakertem yaritsü atema India-i sen cr. 65,000 nungdaker: Raghuram

New Delhi, Rongchii/April 30 (Agencies): Coronavirus tashidak anema India linük shibanga aliba agientsü dak sendakba nung taoba mapang RBI Governor, Raghuram Rajan-i, linük shibanga aliba agientsü atema India-i kanga sangra-a inyaksüla aser tekaraba nung rongsenkettsüing maparen tenzüktüsü, kechiyong kechiyong nüburtem mapang talangka yaritsüa linük dak tashi mali, ta ashi.

Coronavirus tensa mapang nung mejungi kongshir sensakertem yaritsü atema India-i sen crore 65,000 nungdaker, ta Raghuram Rajan-isa ashi.

Brihostibar anepdang sensaksemba mapang nung

taoba mapang Reserve Bank of India (RBI), Raghuram-i Congress lenir, Rahul Gandhi dang item o ya shia liasü.

India rongsenkettsüing apibo sensakertem nem sen crore 65,000 agütsüsü tebilemtsü onük ka masü, ta Rajan-isa ashi.

Linük shibanga aliba agientsü asalentong dak sendakba nung Rajan-i, "India-i kanga sangra-a inyaksüla aser tekaraba nung rongsenkettsüing maparen tenzüktüsü, kechiyong nüburtem mapang talangka yaritsü atema linük dak tashi mali," ta ashi.

"Rongsenkettsüing atema asenoki longjemer telemetba agitsüla, ibaji ajanga linük shibanga aliba agienba mapang nung temang lemtar masü saka

shirang yipten nung saaker jajatetsü," ta pai ashi.

"Mapang talangka linük shibangtsüjibo melamelar, saka ibaji rongsenkettsüing atemabo majung," ta paisa metetdaksü.

Rahul Gandhi-ia, "Infrastructure ajanga nisung sendakteptsür aser maongka agütsür, ajisiüka telemsa aser tesempa lira ibaji ajanga nisung tsüingda tesendaktep piladaksür," ta ashi.

Gandhi-i jembiba o nung ai-aura kaa Rajan-i, "Nüburtem atema loktiliba nung tesünepi tajung. Iba ama tayongzükba tulu aliba mapang nung telemsa malitsüla," ta ashi.

Gandhi aser Rajan na sensaksembaji Congress indang social media handles ajanga sayua liasü.

Coronavirus anema May 4 nungi tetuyuba tasen agütsür: MHA

New Delhi, April 30 (Agencies): Centre sorkari linük nung coronavirus tashidak anema raraba tsütsü May 4, 2020 nungi telatetbatem tasen sangdongogo.

Coronavirus tashidak anema May 3 tashi linük tesem ajak shibangtsü sangdonga lir. Ajidoda May 4 nungi district kar nung tenokdangbatem agientsü aser iba tashidak kanga bulua putetba district tem nungbo maneni ozüing tesashi alitsü.

Ministry of Home Affairs (MHA)-i, iba tashidak anema telatetba tasentem ajanga district aika nung tenokdangbatem agientsü aser iba dak sendakba osangji kobi melii metetdaksütsü, ta sangdongogo.

Linük shibangba dak sendakba nung MHA-i senden ka amenba mapang nung, tang tashi linük shibangba ajanga tajangzük aika nguogo aser

tensa tajungba kümogo ta bangjema liasü.

Twitter ajanga MHA otongdar kati, item tajangzük amajok makümtsü atema May 3 tashi telatetbatem shidak benoktsüla, ta metetdaksü.

Telangana sorkaribo May 7 tashi state shibangtsü lemetogo aser Punjab sorkaria May 3 sülen ano hopta ana state shibangtsü lemetogo. Ajisiüka Punjab nungbo anogoshia anepdang 7:00 ako nungi anüingdang 11:00 ako tashi tenokdangba agientsü, aser iba mapang nungji nüburtemi lijaliyongtettsü.

April 27 nü Ato kilonser, Narendra Modi-i ayongba senden nung adener chief minister aikati, linük nung coronavirus tashidak maneni aika dak puteter, anungji ano maneni linük shibangtsüla, ta benoka liasü.



New Delhi, April 30, 2020: Coronavirus tashidak prokba nokdangtsü atema linük tesem ajak shibanger lia Brihostibarnü New Delhi nung aliba Ashram ka nung enoc (transgender) kati mask agir nisung ka den jembiba noksa nung angur.

Anogoshia nisung lakh ka dak Covid-19 tendangtsü: Harsh Vardhan

New Delhi, April 30 (Agencies): Union Health Minister, Harsh Vardhan-i, taruba anogo ishika tsüingda nungibo anogoshia nisung lakh 1 dak coronavirus COVID-19 tendangtsü sorkar tebilemba lir, ta metetdaksü.

Bodhbarnü tashi nung ICMR-i India linük nung iba tashidak atema samples ajak agi 7,70,764 tendangogo.

Coronavirus vaccine yanglutetsü atema ano mapang talangka agitsü, 'social vaccine' atema linük shibangba aser social distancing ajanga tajangzük ngudar, ta Vardhan-isa ashi.

"Taruba anogo ishika tsüingda nungi tenzüka anogo shia nisung lakh ka dak coronavirus tashidak tendangtsü, tang sorkar aser nija

lab 385 nung anogoshia sample 60,000 shi tendangdar," ta pai metetdaksü.

Pai ashiba agi, linük nung coronavirus tashidak agi shiranger anasü akümba rate ji anogo 11.3 kümogo.

Tang alima nung iba tashidak agi asüba rate ji 7% lir aser India nung 3% lir.

Tang iba tashidak agi shiranger 33% ventilators nung lir, shiranger shilem 1.5%-i oxygen support agidar aser shiranger 2.34% ICU nung lir.

Ajisiüka tensa tamajungba atema linük nung isolation beds, ventilators, PPE aser lir, ta Union Minister-i metetdaksü.

Yashi Health Ministry-i shidi ka ajanga states sorkar ajak dang emergency tensa atema junga renema atatsü metetdakja liasü.



Patiala (Punjab), April 30, 2020: Tawa Patiala nung Nihangs telok ka den raraba mapang nung yirusang, Assistant Sub-inspector, Harjit Singh Brihostibarnü hospital nungi kidangi meyipa aoba noksa nung angur. Tawa Patiala nung coronavirus dak sendakba duty inyakba mapang nung Nihangs telok kati pa teka lepdokja liasü, saka doctor temi tanaben tekaji arrloksüogo.



Manila, Philippines nung April 30, 2020 nü nisung aliba tesem ka nung mi adokba sülen firefighter tem ki rongdoker aliba ka jakdang nokdaka aliba noksa nung angur. Brehostibarnep Manila indang Tondo distric nung mi agi ki ishika rongdoka nisung trok asü.

US election nung shilem agitsü tejangraba mali: China

Beijing, Rongchii/April 30 (Agencies): US Tir, Donald Trump-i, November ita election agiba mapang pa nem mokokdaksütsü asoshi Beijing-i merangtsü ta amangr, ta ashiba sülen China-i US tir election nung shilem agitsü tejangraba mali, ta shiogo.

"US tir election ya linük ka telungten indang maparen lir, aser yagji onoki shilem agitsü tejangraba mali," ta Chinese foreign ministry odongtar Geng Shuang-i osangbener senden ka nung ashi.

"US nung aliba nüburtemi par election politics nung China matsüoktsü imlar."

Bodhbarnü Reuters atema sensaksemba mapang Trump-i, "Iba election nung ni tamakok angutsü asoshi China-i par akokba inyaktsü aser shishilempaba aser danga maparen nung ni China timtemdaksüba ajemdaksütsü mechi Beijing-i Democratic telok nungi Joe Biden nem election kokdaksüner ta amanger," ta shia liasü.

Coronavirus tashidak wara mechi Beijing nem tim telangzüba agütsütsü asoshi danga lenmangtem repranger, ta Trump-isa ashi.

Coronavirus tasenba ajanga tango sashiba nung timtem agütsüba COVID-19 asoshi Trump aser danga ketdangsertemi China tenüing asener. Iba tashidak yagi America nunger million 1 dak tema menepa lir aser US rongsenketsüing kanga mejungi kümdaksüogo.

"Ni inyaktsü mapa aika lir. Kechi atalok, ibaji onoki reprangdar," ta Trump-i Reuters dang ashi.

Geng-i Brehostibarnü jembiba mapang, iba wara yagi China daka kongshioigo aser ibai China mapa masü, ta nenshia ashi.

"Iba tashidak wara junga anepaluba mesütetba ajanga yimten yimsüsür kari Beijing tenüing asenba ajanga US khuret dang temai adoka sayur. US-i ya meteta alitsüla: tsükchir ji virus lir, China masü," ta Geng-i ashi.

UK nung COVID-19 agi asür 26,097 jungogo

London, Rongchii/April 30 (Agencies): United Kingdom nung Bodhbarnü novel coronavirus agi asür aika liasü, aser iba ajanga tang iba linük nung COVID-19 agi asür nisung 26,097 jungogo, kong sorkari linük nung aliba mozüki, care home aser danga tesemtem nung iba virus agi asür azüing tenzüker.

UK Foreign Secretary Dominic Raab-i Downing Street nung osangbener den jembiba mapang ashiba agi, asürtem ya March ita nung asüba dena azüingba lir, anungji anoho ishika tsüingda asüba ama mezüngshitsüla.

Taoba mapang sangdonga aliba nung asür 3,811 bendenlok aser Mongulbarnü asür 765

liasü. "Iba asadanga nung asenoki nisung taküm kata mezüdoktsüla," ta Raab-i ashi, shiba Ato Kilonser Boris Johnson tetong Carrie Symonds-i Bodhbarnü teburchanu ka asoba mapang [a melen nokdaka liasü.

"Longpok tatemlen tesangwa lir. Saka iba ama tensa nung asenok dak tatasaba alitsü nüngdaker," ta Raab-i ashi aser COVID-19 prokshiba azüoktsü mechi tenokdanga agüja alibatem salatsü kanga kerara, ta nenshia ashi.

UK nung iba tashidak tang kanga kera züina aoba mapang ka lir aser tensa kanga majung, ta minister-i ashi. Pai Germany athishia jembiba, kong social

distancing ozüing agienba sülen coronavirus tali putetba ajanga tanaben anempongtsü sentong lir.

"Tang asenoki iba tashidak wara nokdanga maparen nung renloka aliba makoksadaksütsüla. Asenoki mapang tetemjen nung tim telemtetba agitsü," ta pai ashi.

Iba osangbener senden nung Public Health England indang Medical Director, Yvonne Doyle-i ashiba agi, COVID-19 indang tang tesüsa sayaba ya tejangjaba aser coronavirus agi shiranger mozü kidang anepaluba ajema akümba sayur, saka anempongba mesayatsüla.

"Nisung timbai kidang alitsü kanga meranger, anungji imlibilema maneni kidang liang," ta lai ashi.

Yemen nung COVID-19 agi nisung ana süogo

Aden, Rongchii/April 30 (Agencies): Yemen nung coronavirus tashidak tasenba dak sendakba nung mezüingbuba nisung ana süogo, aser iba ajanga rara agi raksatsür aliba linük nung tetsüba tali akümer.

Linük south tsütsü rong anenba yimti, Aden nung mozüki ka nung asüba nisung ana ya adianu lir, ta osang ajanga ashir.

Yangji ketdangsertemi nisung pongu dak iba tashidak jangjatetba sangdongogo. Taoba mapang iba linük nung nisung ka dak dang novel coronavirus ya puteta liasü.

Iba linük nung COVID-19 ya meputeti prokshia aor alitsü südi, ta UN-i shia lir.

Küm pongu civil war ajanga Yemen linük kanga mejungi raksatsüogo, kong nisung 100,000 dak tema taküm sama aser alima nung humanitarian crisis tamajungtiba tenzüker, ta züingshir.

Yemen nunger nisung million 10 ayawara ajurutsü jenjang nung lir, nisung million 20 healthcare mangur aser mozüki shilem 50 shi nung tashidak wara tamajung agi kongshir anepalu mesütetsüsa jenjang nung lir.

Hopta pezü shi tejakdang Yemen nung COVID-19 mezüingbuba ya sorkar kübok aliba Hadramawt kübok al-Shihr nung rong anenba tesem ketdangser ka dak puteta liasü.

Bodhbarnü committee ka ajanga ashiba agi, al-Shihr nungi anüolen mile 335 shi

polar Aden nung nisung pongu dak iba tashidak puteta liasü.

Par pongu ya yimti north tsütsü al-Mansourah district nungi lir, aser asür ana ya adianu liasü, ta osang ajanga ashi.

"Tenaprong ya al-Mnsourah yimti nung aliba private hospital kati bener ao, kong ka Hombarnü aser Mongulbarnü asü," ta osang ajangasa ashi.

Yemeni state TV den sensaksemba mapang Health Minister Nasser Baoum-ia nisung ana asüba ya metetdajtsü aser COVID-19 agi shirangba yimya aser Yemen nung küm ishika tsüingda Dengu Fever ama menatepba tashidak wara agi shirangba yimya mesüktepa lir, ta ashi.

Taoba hopta tatemlen Aden nung pei sasa yimsü asütsü sangdongba telok, Southern Transitional Council (STC) nungi ketdangser katia anogo ishika tsüingda coronavirus züina aotsü, ta tekümdangtsü ashi.

Iba tashidak putetba sülen STC ajanga Aden nung anogo asem curfew benokogo.

Houthi nungertemi 2015 küm March ita linük anüolen tsütsü tesem timba amokbanga Tir Abdrabbuh Mansour Hadi bendang linüki jena aotsüsa akümba sülen Yemen nung azüdokshi tali aküm.

Iran, Saudi Arabia aser danga Arab linük ti ajanga mitkar tsütsü yarir südi ta amangba telok ka kanga sashia aküm aser Hadi'er sorkar tanaben amenokaka rara manener.

New York nung nisung tasü mang aika gari nungi ngutet

New York, Rongchii/April 30 (Agencies): Bodhbarnü New York yimti nung unrefrigerated U-Haul garitem nung nisung tasü mang aika ngutet.

Osang ajanga ashiba agi, U-Haul van ka aser danga van ana aser truck ka asüpila sentong agiba ki ka kima anendena liasü.

Nisung tasü mang ayuba gari nung aliba freezer mapa meinyak, ta Funeral Services funeral home kibur Andrew T. Cleckley-i ashi, kong garitem nung nisung tasü mang 100 shi yua liasü.

Iba funeral home kibur ya

ano mejangjateti lir aser yangji alirtem den mejembitetet. U-Haul garitem nung tasü mang ya mapang kobika yua liasü ar memetet mesüra parnok ya COVID-19 agi asüba asü masü ar ajia mejangjateter.

Garitem nungi tezüknem adokba sülen yangji alirtemi gari nung nisung tasü mangtem ya ngutet, ta New York nung aliba media temi ashir.

New York Police Department-ia iba tatalokba indang nung telangzüba magütsü aser Department of Health den osang magitepteti lir.

Alima ajunga sünga prokshiba coronavirus tashidak ya New York City nung tamajungtiba kongshia lir aser iba yimti indang funeral home tem nung nisung tasü mang agi masemer. Bodhbar nikongdang tashinung iba yimti nung COVID-19 agi nisung 18,000 dak tema süogo, ta Reuters ajanga asadanteta lir.

Nisung onsara asüba ajanga hopta aika nisung tasü mang aremstsü mesüra rongdoktsü menur, ta asüpila sentong agiba tesemtem nung inyakertemi ashir.



Rome, Italy nung April 29, 2020 nü ketdangser kati ki ka kima mesen südaktsüba mozü akhaba noksa nung angur. COVID-19 tashidak wara agi anempong nung aliba linük, Italy nung nisung taküm 27,600 dak tema agiogo. Iba linük nung COVID-19 agi asüba, menepba aser taneptsü anguba ajak senteper nisung 203,591 lir, ta linük indang Civil Protection Department ajanga Bodhbarnü ashi.

Samaj balala den Y. Kikheto Sema, IAS senden amen



Marwari Samaj, Bengali Samaj, Jain Samaj, Oswal Samaj, Aggrawal Samaj, Gorkha Samaj, Kachari Tribal Council, Punjab Samaj, Kerala Samaj, Bhojpuri Samaj, Muslim Council nungi senden nung adener ketdangsertem tangokba noksa nung angur.

Dimapur, Rongchii/April 30 (TYO): APC and Commissioner & Secretary & Convenor, empowered Group, Dimapur District, Y. Kikheto Sema, IAS-i April 30 nü Hotel Saramati nung Dimapur nung Samaj balala den senden ka menogo. Linük mokdanga ayuba lapokba sülen linük nung tanga tesem nungi Nagaland-i meyipa arurtem atema Quarantine facilities renemtsüba onük nung ajemdaker parnok sensaksema liasü.

COVID-19 tashidak prokshia meyoktsü asoshi sorkari jenjang balala agiba indang metetdaksüba den APC-i ashiba agi, Dimapu ya Nagaland asoshi kikümtong lir anungji sorkari iba tashidak den raratsü asoshi district nem tali temulung agüja inyakogo. Paisa,

iba tashidak den raratsü asoshi nisung ajaki teka amteper inyaktü asoshi ayongzüba den Administration, Police aser Medical kijai iba tashidak maziüktetsü ta ashi.

State tanga nungi maruteti alirtem atema quarantine facilities renemtsüba indang jembidang pai, committee-i quarantine centres lapoktsü asoshi sorkar meyong ki kar shimogo aser ki yanglushi tenzüko, ta metetdaksü.

Convenor-isa, senden nung densema aliba lokti tentet balala dang parnok lokti nungi district-i meyipa arutsü asoshi mulunga aliba nisungtem dang parnok aruba tesem asündangtsü aser number achaayanga agütsüba benokdangogo, ajita asünungdang iba dak ajemdaker renemshitsü.

Senden nung dena aliba lokti

tentet ajaki takokba tashi teyari agütsüba nanzükogo. Parnoki parnok meyong ki tem par nisungtem atema quarantine centres ama amshitsü mulunga aliba lemsatepogo koba medical department aser police-i aachayangtsü. Marwari Samaj aser Punjapi Samaj-i par nisungtem quarantine nung ayuba mapang senotsü indokba ajak parnok i achaayangtsü nanzükogo.

Medical nungi ketdangsertemi tanga state nungi arurtem agizükba mapang jenjang agitsüba tem indang metetdaksü. District Administration aser Police-ia, lokti tentet balala nem parnok teyari asoshi tenüngsang agütsüba den iba tashidak den raratsü asoshi tang koma nongita yaritepa arudar yamaji maneni yariteptsü mepeshi.

IMPACT Ministry ajanga teyari agütsü



Dimapur, Rongchii/April 30, 2020 (TYO): Nübur aser loktiliba tejakleni anitsü aser temelenshi tajung adokdaksütsü asoshi nükla tulu yur inyakba ministry,

IMPACT Ministry, Dimapur-i teyari ama, Dimapur Government College Girls Hostel indang Management Committee nem jang-o-tzü aser tanga chiyongtsütem agüja liasü, ta IMPACT Ministry-i metetdaksüogo.

Iba hostel nung kaketshir 52 lir aser Hostel ya Dimapur

Government College tenüng nung Hostel Management Committee ajanga achaayanger.

Tesem tezü nungi arur kaketshir tem lidaktsütsü aser iba den külemi sensaker kibong nungi adoker kaketshir tem dang nungi taa tajemba agia iba hostel achaayangtsü nükjidong nung iba hostel lapoka liasü.

IMPACT Ministry indang Executive Director, Senti Longkumer-i ashiba agi, "Alima ajanga asüngba COVID-19 wara ajanga maparen ajak

shibanger aliba mapang, timtema alirtem yaritsü atema onoki pelashishia aser mulungsoa inyaker. Nübur aser telok balalai tangatetba tajung agi iba wara ajanga kanga dang mejungi konsghir alirtem nungittsü aser tim teyari agütsütsü asoshi ni ajungshir."

Item kaketshir nem teyari agütsütsü asoshi nisung aikati shilem agi mapa tajung inyakogo. Mulungsoa tenla agütsür ajak dang IMPACT ministry ajanga pelaba lemsateper, ta Ministry-isa ashi.

Menungra Bilemteter

Asür Nungsanglila, Ungma (1932 - May 1, 2019)

Oja, nai onok toktsür orr tanü küm ka süia arur saka nü temeim, ajemalu shisatsü aser sarasadem onok mulungjang nung teti lir.

Tanü onoki na kanga dang menungra na onok dang nungi pilaba anogo sarasadema amonger.

- Chirnurtem, Semchirtem, Anükapang aser Sosemtangsem.



KIBONG KÜMER KÜM 50 AJUNGBA TEPELA SALEM

Mr. T Nungsangoba & Mrs. Imodangla (Molungyimsen) (1st May 1970 to 1st May 2020)



Alima nung rongsen jenti-i malizüktetba aser nübur aikati mengutetba senti temoatsü nenati ngutetogo. Ya Tsüngremer temoatsü tulu ta züngshir. Maneni Tsüngremi nena nem arishi talang aser anema aliba moajang ta onok sarasadem.

~ Kinungertem.



OFFICE OF THE

AO SENDEN

H.Q: MOKOKCHUNG: NAGALAND

Ph: 0369-2228896/ e-mail: aosenden@gmail.com

Date: 30/04/2020

PRESS RELEASE

Aoli Tsükong terok sanger aser Jila aser tesem balala nung alir Ao Senso ajak den Ao Senden mentendi nungi 2020 Moatsü Mong Salem lemsateper. Tanü alima ajanga nung COVID 19 Pandemic sangdonger lokti senden kechia atenshia mekatetsüsa alima Yimsütsüba bangdak ajanga tenokdangba aguja aliba tensa ka nung, asen Aor Amongtsümong tongtipang rongnung ka, iba Moatsü Mong mongpu ajurushitsüba kümogo. Taküm iba mongpu nung lokti atenshia iba benjongmong sentong yanglua memongtetakasa, Ao Senso ajaki pei alidak tesem nung kija aser kibong shiai iba benjongmong mapang asen teyanglur Tsüngrem tenung sanga Pa nungi temoatsü meshia iba Sobaliba Benjong Mong anemponga amongtsü aoshi Ao Sendeni Ao sünak abener ajak dang iba sangdong ajanga ayongzüker.

(Chubawati Longchar)
President

(Imtipokyim)
Secretary

Itanagar nung dokan ka shibangtsüogo

Guwahati, Rongchii/April 30, 2020 (Agencies): ta sangdong nung shia lir.

Legal Metrology (Packaged Osettsüset jenjang tem Commodities) Rules, 2011 asadangshiba aser azüokba indang rule 6 anema inyakba teloki (price monitoring and atema Legal Metrology Act, control team) Naharlagun 'C' 2009 indang Section 36 kübok sector kübok general store ka dokan kibur anema ken o nung pan masala aser moko benokogo, ta sangdong ajanga (cigarette) tem yoka aliba metetdaksü.

putetba sülen, Bodhbarnü iba "Sorkari latetta yutsüba dokan shibangja liasü, ta jenjang nung nüngdakba sangdong ajanga metetdaksü. osettsüsettem ayoktsü asoshi

Iba dokan nung moko aser dokan kibur ajak dang pan masala ayokba ya April 25, metetdaksüogo. Iba den 2020 nü district magistrate tem MRP nung ayoktsü asoshi ajanga agütsüba tetuyuba anema inyakba maparen ka lir, tetuyuba agütsüogo," ta kasa ta ketdangser sangdong ajanga sangdong ajangasa metetdaksü.

"COVID-19 lockdown Sorkari latetta yutsüba mapang osettem peria inyakyim aser tetuyuba tem manguba tenüng atemer nung aibelenra ozüng agi talirtem dang dokan kiburi melaba ama temerenshi tulu jenjang talila temloker ayokba alitsü, ta team-i dokan kiburtem tashishiba ken o tem-a liasü," dang metetdaksüogo.

Spain nung asayatem COVID-19 tendangtsü

Madrid, Rongchii/April 30 (Agencies): June ita nungi season tenzüksü asoshi jenjang agia, La Liga club tem nungi asayatem dak taruba hopta nungi novel coronavirus tashidak tendang tenzüksü, ta Bodhbarnü league otongdar sangdong ka ajanga metetdaksü.

COVID-19 prokshiba azüoktsü atema Europe nunga maparen ajak shibangtsü asoshi ozüing tesashi agütsüba ajanga, March, 2020 tetenzüklen nungi Spain nung asayatem pei pei kidang training agitsü asoshi tetuyuba agütsü, saka Spain Ato Kilonser Pedro Sanchez-i, taruba Hombar nungi training agiba tesemtem nung asayatem training tenzüksü asoshi lapoktsür, ta sangdonga liasü.

Training maparen tenzüksü atema La Liga mezüingbuba iba virus ali/mali metettsü/jangjatsü atema asayar aser staff tem RT-PCR (Reverse Transcription - Polymerase Chain Reaction) aser serology test agitsüla.

Shilem tanabubaji, iba tetendanga agir sülen, asayar kija training agitsü, koba May 06, 2020 nungi tenzüksü. La Liga indang tasembuba shilem nung, lokti tilala - asayar ti (8) tashi adenshia training agitettsü. Shilem pezübubaji, telok ajunga külemi training agitsü, koba iba

maparen metenzük tsüingda tajemba agia hopta anabo tensa asadanga atatsüla.

Kasa sangdong ajanga angazükba agi, La Liga inyakyim shilem pezüprongla (Four Phases) ya ita ka nunga tembangtetsü akok, koba tetezü Spain nung 'top-flight' asayatem taküm June ita tom nungi tenzüksettsü.

La Liga aser Spain indang tanabuba division tenzüksü asoshi hopta 11 anünga lir. Copa del Rey final aser tanabuba division playoff asayatem atema anogotem yanglushitsü nüngdaker.

Iba wara süshia maoba ajanga France aser Netherland nung top division asayatem masayatetsü akok ta sangdonger aliba mapang ka nung, Spain nung saisapong department densema tongtibang saisapong institution ajaki iba season tembanga asayatsü asoshi nangzükogo.

La Liga tir Javier Tebas-i ashiba agi, iba season tembanga magiteta euro billion 1 tashi akoksatsü, kasa mapang linük rongsenkettsüing ajungkettsütsü aser nüburttem dang iba wara tensa tesüingjema kümndar ta sangoktsütsü atema saisapong tenzüksüla, ta sports ministry-ia ajungshir.

"Saisapong tanaben tenzüksütsü," ta Bodhbarnü Twitter ajanga sports minister,

Irene Lozano-i lemsatep.

"Inyakyim shilem balala lemsar saisapong ya tanaben tenzüksütsü aser saisapong tenzüksütsü atema iba wara tensa asadanga aser akok tashi merükmejua ayuba den nisung o nisung tsüingda pilar khenyongi mekonshitsü asoshi meratem agitsü, saka saisapongbo ayonga asayatsüsa. Iba ama tensa ka nung asayatem timtem angateta aser bendanga agüja inyakba asoshi pelar. Nenok ya nüburttem atema tatishitsüka lir," ta Irene-i ashi.

Real Madrid captain Sergio Ramos-i ashiba agi, football asaya tenzüksü asoshi kanga dang yongyasete liasü.

"Real Madrid tula semer Santiago Bernabeu stadium nung taoba mapang ama football asayatsü asoshi yongyasete," ta Ramos-i ashi.

"Iba asaya tenzüksü asoshi mapang agitsü, saka maparen tenzüksettsüsa mongintem achaayanga inyaksü aser kodang tensa süngjema kümndar, onoki pelashishia asaya tenzüksü," ta Ramos-i shisem.

Alima nung COVID-19 tashidak agi asür United States nung timtiba asütsü. America nung iba tashidak agi nisung 24,000 dak tema süogo aser wara ajanga nisung timtiba asüba rongnung Spain tanabuba jenjang nung lir.

England nunger football asayar tejen Trevor Cherry süogo



London, Rongchii/April 30 (Agencies): Taoba mapang Leeds United nungi asayar aser England defender Trevor Cherry arishi küm 72 nung asü, ta Bodhbarnü Leeds United-i sangdonga liasü.

Cherry den külem asayar aser club nung ajaki jangja alisang Norman Hunter iba akümüli nungi pila aoba sülen hopta ana majungdang, 1973/74 küm English Champion asayamung takok anguba team; Leeds indang züngsem, Cherry asüba osang angazükger.

Cherry-i England national team atema asaya 27 nung shilem agi aser tesüsa international sabang nung pai England team captain ama asayaogo.

"Club nung asayar mongin Trevor Cherry arishi küm 72 nung meimlai aser ajungbena asüba osang angazükger Leeds United aoksar aser mulung züreper," ta sangdong ka ajanga Club-i metetdaksü.

Terriers club ya mezüing jenjang nungi atsüingzüka aluba sülen 1972 küm pound 100,000 (USD 125,000) atema Yorkshire den kanga toktepa asayaba telok Leeds nung Cherry maden tsüingda, pa Huddersfield club nungi asaya tenzükger tenüing tajung yanglua liasü.

English title takok angutsüsa Leeds nung shilem tajung agiba den külemi, 1975 küm European Cup asayamung final nunga club nung Cherry-i shilem agi, saka iba final asaya mapang referee inyakyim nung mangtetep balala aliba ajanga Bayern Munich team-i Leeds United team tsükdakja liasü.

1976 küm Billy Bremner melena Leeds captain inyaksü atema Cherry shim aser Elland Road (Anüolen Yorkshire, England kübok Leeds tesem nung aliba football stadium ka) nungi Cherry-i asaya 486 nung shilem agia liasü.

Iba sülen, Bradford City nung Yorkshire club tanga ka atema Cherry-i shilem agia asaya aser manager ama inyakogo.

Bradford-i ashiba agi, Cherry asüba osang angazükger, club-i mangyim tejashi lemsateper. Kasa mapang Huddersfield-ia, Cherry ya nüburttem ajungmesotsüsa asayar tajung ka liasü, ta lemsatepogo.

Coach Maggie küm ti atema mapa nungi anentsür



Rongchii/April 30, 2020 (Agencies): Taoba US Olympic team coach Maggie Haney-i achaayangba gymnast tem mulung raksatsüsa lai o mekümdangi jembiba ken o nung ajemdaker USA Gymnastics-i küm ti atema la mapa nungi anentsüogo, ta Bodhbarnü Washington Post sangdong ajanga metetdaksü.

Osang ajanga angazükba agi, USA Gymnastics coach ya iba osang sangdongba mapang nungi tenzükger mapa nungi anentsür aser iba den külemi ano küm talila ana

bendenloksemtsütsü.

New Jersey nung Haney-i achaayangba club-i la den ajurutep aser Reuters-i ken o ashishiba dak sendakba nung USA Gymnastics-i telangzüba menoa magütsü.

2016 Rio Olympic gold medal takok angula Laurie Hernandez atema küm talangka coach inyakala Haney mapa nungi anentsütsü asoshi, züngsem asem agi tentetba panel balaka aser Safe Sport panel ajanga telemtetba agi, ta kasa sangdong nung shia lir.

Haney, shibai 2018 World

Champion Riley McCusker indang coach liasü, lai gymnast tasentem dang o tamajung shia arrtsüba aser yirur alir gymnast kar dang practice asütsü aser tetoktepba nung shilem agitsü asoshi akhangba dak sendakba nung ken o tem ashishiba sülen January nung la ken atema mapa nungi anenja liasü.

Monmouth Junction, New Jersey kübok MG Elite Gymnastics nung Hernandez indang coach inyakba mapang alimai Haney ya jangjaa aküm. Haney lenisüba kübok 2016 Rio Olympics asayamung nung Hernandez-i gold aser silver medal angu.

USA Gymnastics asayatem shisatsü agi magizüksüsa mesüra parnok dak azüabonga mekongshitsüba temang shilem nung kongshiba dak sendakba nung tashishiba ken o aika mebendeti lir aser iba amala maparen nung taoba team doctor Larry Nassar-a densema lir. Tetsür 350 dak temai Dr. Larry-i parnok dak tim masüba mapa inyakba kuli tejangja agütsüba sülen, 2017 küm pa ya tepuokdak küm 300 ayutsü asoshi obendang agüja liasü.

David aser Candice nati Telugu ken ka nung tsüingsang

Sydney, Rongchii/April 30 (Agencies): Alima ajunga asüingba wara süshia maoba ajanga, cricket dak sendakba asayamung ka danga masayateti lir; aser iba ama mapang ka nung Australia nunger opener David Warner-ia par kibong den mungdaki.

Brehostibarnü, video yangluba lemsatepba sabang 'Tik Tok' ajanga Warner-i ano video tanga ka lemsatepa liasü. Iba video nung Warner aser pa kinungtsü Candice nati nungtugu ken 'Butta Bomma' nung tsüingsanga sayur. Iba den külemi video nung apuani yagi music video (Butta Bomma) den apet tsüingsanga meratem benoka tsüingsanger.

"Nüburttem, südoksema kazüba nungi saksalemang aser tangba ya tiktok nung tsüingsangtsü mapangbaji lir," ta ta Instagram nung Warner-i iba video dak sendakba nung asayamenüa lemsatep.

'Butta Bomma' ya taküm January 7 nü sayaba Telugu movie 'Ala Vaikunthapurramulo' indang nungtugu ken ka lir. Iba film nung Allu Arjun aser Pooja Hegde nati tongi shilem agir.

Iba hopta tetenzüklen, Warner-i temenüntsü aketba video ka lemsatepa liasü, kong pa kinungtsü Candice tena ya video nung mapa balala melentepa inyakba tangoker sayuogo.

Iba video nung Warner-i Australia cricket sübosülemtsü abensa sübor asayar ama aser pa sülen Candice-i kayak (rong tilaka) ka nung mener ayong nung aoba ama sayur. Kasa video nungsa apuani yagi inyakyim ya melentepa inyaka sayur, kong Warner-i pa kinungtsü indang swimsuit semer 'kayak' nung aoba aser Candice-i Australia indang ODI sübosülemtsü abensa sübor cricket asayar ama tangoka lemsatepogo.

Iba video melemsatepdang, Warner-isa par jala den külemi Bollywood ken 'Sheila Ki Jawani' nung tsüingsanga TikTok video ka lemsatepa liasü.

Taoba mapang ama tensa süngjema ali asübo, Indian Premier League 13buba asayamung nung Warner-i Sunrisers Hyderabad telok anir asaya lila, saka CVOID-19 wara süshia maoba ajanga, iba asayamung asayatsü asoshi anogo atsülangtsüogo.

BILEMDANGANG

"Myipa angutsü imlaa teyari tagütsüma."